

Et poi con la Zonta fono sopra certa materia, che nulla feno, et gratie particular; nulla da conto da far memoria.

È da saper: per li Avogadori extraordenari, fo fato *iterum* retenir Tranquillo scrivano a le Cazude, et volendo aver ne le man Paulo Agustini scrivano ordenario a le Cazude, per esser stà trovato si havia retenuto in si ducati 900 in zercha spectanti a la compagnia di quel Cristofal Zorzi di Cendadi di certo sorabondante di soe caxe vendute, esso Paulo si absentò in uno monastero.

33 *Copia di la letera dil re di Tunis scritta a la Signoria nostra.*

Sia laudato Idio Omnipotente che ne ha creato senza compagnia, nè altra persona, et fa el voler suo senza altrui consejo, et non ha revocation, che tutti li profecti et sancti a nome suo siano laudati, et sia laudato el Messia anema de Dio, et sua parola, et cussi tutti li soi parenti, amici et propinqui siano salutati in sempiterno, dal servo di Dio che ha dominio per la gratia sua et ha potentia per la sua potentia che li ha dato, cognoscendo che tutto quello che procede è da la clementia sua, e fato Signor de li Mori, Mahemet mantegnitor de la justitia universal, fiol dil signor mio padre Mahamet Laxen che reposa ne la gratia de Dio, fiol del primogenito Bonbdelo Mahamet Monsit liberal et famoso a tutta gente et fiol dil Signor re de li Mori, honor de tutti li Re Boemer Otoman el victorioso de tutte le fede e nation, et fiol de li nostri antiqui mazor antecessori passati, che hanno mantegnudo la fede, che Dio prosperi de ben in meglio conservando el Stado *cum* el popolo et paese.

Al capo e mazore de li cristiani de la città di Venetia, et a li signori grandi e poderosi de gran sangue e governadori, et al più alto e signor Doxe Leonardo Lauredano governador de justitia et Signor a vita e a la Signoria che al presente se ritrova al governo, e a tutti quelli che stano a la sua obedientia, et a tutti li merchadanti universalmente che Idio li prosperi insieme al camino del ben et de la verità che sia in piacer de Dio, saluti infiniti, et a tutti quelli che seguitano el camino bono, lassando la via mala. Da poi di tutto questo, vi scrivemo che Idio vi daga quello che desiderate e tuto quello che sapete domandar prosperi *cum* la benivolentia de la casa real de Tunis florida, capo de tuta la Barbaria, che Idio la guardi et mantegni *cum* assae ben, pace et quiete, abundantia et sanità, che più non se pol

dir per la gratia de Dio e de li profeti, ringratiando et laudando Idio quanto la pioza che vien in terra, che ne ha fatto gratie infinite, et cussi Dio mantegna el vostro ben voler, che sia in piacer de Dio. L'è zonto a nui in questo tempo le vostre galie de Ponente, et sono desmontati li vostri Patroni, et parte de li mercadanti principali. Poi dice Idio sia quello che punisca quelli maligni homeni che sono stati causa de li disturbi, guerre e discordie vostre, per le qual tali pratiche de Tunis sono stà disturbate. Scrive poi per caxon di crediti di nostri con la sua caxa real manda de qui suo ambador el savio, honorado, degno di nobil famiglia e sangue, da tutti cognosuto et creato virtuoso, exaltado, conclusion et compimento de ogni ben Abrain el Maseradi, servidor et amigo nostro e scrivano de la nostra dohana e testimonio de li nostri transiti.

*Etiam* lo mandemo per renovar la pace tra voi e noi, et confirmar tutto quello che è stato con li vostri nostri antecessori, rechiedendovi che a vui piaqua far ritornar li vostri a questa casa de Tunis, quale habiano ad habitar; ancor dar causa che de merchadantie se empiano li magazeni et case come per el passato era in Tunis, e che a vui piaqua tornar a far venir le galie nostre di Levante et de Ponente come per el passato, e mandar uno vostro Consolo sia de li vostri mazor zentilhomeni, per el mezo del qual haverà a restar et continuar pace vera et pati fermi, et tra nui se daremo la vera fede *cum* zuramento apresso de la testification de le consciencie nostre, per satisfaction et compimento de tute cose; et a li vostri merchadanti, ve zuremo et prometemo salvo conduto e fede da parte de Idio et del suo messo Machometo in le persone beni et merchadantie, con tutto quello se atoverà de li vostri, da nui sia sopra tutte le altre nation de cristiani, et restarete sopra le teste loro, et questo per la bontà et cortesia vostra sempre stata sopra tutti li cristiani, et per la alta sedia vostra et miglior de tutti li altri, e questo grandemente è cognosudo da tutti esser ne li zentilhomeni et nation vostra; le qual cose ne astrenze et causa a volervi et desiderarvi. E sapendo la benivolentia et amor vostro de parole et de fati verso la casa nostra di Tunis, sempre stati, et che sete homeni justi, et per far justitia et el dover a tutti, andando per la via dreta, velemo *etiam* che el ve piaqui tutto quello sarà tra el nostro ambador et li merchadanti vostri farne asaper, che de qui lo farà la Signoria vostra per justitia, nui saremo contenti e procuraremo che Dio permela per tuto sia pace senza guera, et destruzi tutti quelli che zercano